



Ramazan i Kur'an – zaštita za muslimana (Medina)

Hatib: dr. Ali ibn Abdurrahman el-Huzejfi

20. šaban 1445. po Hidžri / 1. mart 2024.

Hvala Allahu, Milostivom, Samilosnom, Blagom, Uzvišenom. Hvalim svoga Gospodara i zahvaljujem Mu na blagodatima, vidljivim i nevidljivim, onima koje znamo i koje ne znamo. Svjedočim da nema boga osim Allaha Jedinog, Koji nema druga, Vlasnika Arša plemenitog, i svjedočim da je naš vjerovjesnik i prvak Muhammed, sallallahu alejhi ve sellem, Njegov rob i poslanik, opisan svakim plemenitim svojstvom. Allahu moj, smiluj se, spasi i blagoslovi Svoga roba i poslanika Muhammeda, i njegovu porodicu i ashabe, pomagače njegove ispravne vjere.

Bojte se Allaha, jer onaj ko se bude bojao Allaha i žurio ka onome što Ga čini zadovoljnim, Allah će ga sačuvati onoga čega se boji i od čega strahuje, i sačuvat će ga zla i propasti. Allah, džellešānuhu, kaže: "... a onome koji se Allaha boji, On će izlaz naći i opskrbit će ga odakle se i ne nada." (Et-Talak, 2–3) I Uzvišeni kaže: "A onome ko se Allaha boji, On će sve što mu treba učiniti dostupnim." (Et-Talak, 4)

O muslimani, natkrilio vas je blagoslovljeni mjesec, u kojem Allah spušta Svoju beskrajnu milost i u kojem je spojio raznovrsne ibadete i oblike pobožnosti, kao ni u jednom drugom mjesecu, kako bi muslimani u njemu činili što više dobra i lijepih djela, a udaljili se od loših djela i zabranjenih stvari. Suština svih ibadeta jeste činjenje onoga što je Allah naredio, u formi obaveze ili preporučenog djela, nadajući se Allahovoj nagradi i zadovoljstvu, i ostavljanje onoga što je Allah zabranio, iz straha od Njegove kazne. Uzvišeni kaže: "... a onaj ko čini dobro, bio muškarac ili žena, a vjernik je – ući će u Džennet i neće mu se učiniti ni koliko trun jedan nepravda." (En-Nisa, 124)

I Uzvišeni kaže: "Reci: 'Ako ne budem poslušan svome Gospodaru, ja se plašim patnje na Velikom danu.'" (El-En'am, 15)





I Uzvišeni kaže: "Onaj ko bude uradio koliko trun dobra – vidjet će ga, a onaj ko bude uradio koliko trun zla – vidjet će ga." (Ez-Zelzele, 7–8)

U ramazanu su se spojili farzovi i nafil, i zekat za one koji podliježu ovoj obavezi, i "mali" hadž, umra, prema riječima Poslanika, sallallahu alejhi ve sellem: "Umra u ramazanu vrijedi kao hadž ili hadž sa mno." (Buhari i Muslim od Ibn Abbas, radijallahu anhum)

U ramazanu su se, također, spojili različiti oblici dobročinstva, pozivanje da se čini dobro i odvrćanje od zla, razne vrste zikra, a najveći i najvredniji zikr jeste učenje Kur'ana.

Svi muslimani raduju se Poslanikovoj radosnoj vijesti o ramazanu, kao što se navodi u hadisu Selmana, radijallahu anhu, da je rekao: "Poslanik, sallallahu alejhi ve sellem, obratio nam se zadnjeg dana šabana i rekao je: 'O ljudi, natkrilio vas je veličanstveni i blagoslovljeni mjesec, u kojem se nalazi noć bolja od hiljadu mjeseci. Allah je njegov post učinio obaveznim, a noćni namaz u njegovim noćima dobrovoljnim djelom. Ko u njemu učini pobožno djelo, bit će kao onaj ko je obavio farz izvan njega, a ko u njemu obavi farz, bit će kao onaj ko je obavio sedamdeset farzova izvan njega. On je mjesec strpljivosti, a nagrada za strpljivost je Džennet, i mjesec solidarnosti, i mjesec u kome se uvećava opskrba vjerniku. Ko u njemu nahrani postača, to će mu biti oprost od grijeha i iskupljenje od Vatre, i imat će nagradu postača, s tim da se njemu neće umanjiti ništa od nagrade.'" (Ibn Huzejma)

Nebo i Zemlja pripremaju se za ramazan, a zdrava srca i čiste duše pripremaju se za prihvatanje Kur'ana i njegovih blagoslova, žele da ih on obasja svojom svjetlošću, očisti svojom duhovnošću, nadahne svojim miomirisom, i da napreduju na ljestvici njegovog savršenstva, oplemene se odgojem časnog Kur'ana, koji nije dostigla nijedna ranija knjiga, i koji pronalazi put do najsuptilnijih krajičaka duše, i ulazi u nju na svaka vrata, koji podstiče na dobro i upozorava na zlo, djelujući na razum i emocije svojim nepobitnim dokazima, koje ljudi ne mogu dostići, i uputama koju ne mogu pokolebati strasti, jer je Kur'an najveća mudžiza data prvaku svih ljudi Muhammedu, sallallahu alejhi ve sellem. Vjerovjesnik, sallallahu alejhi ve sellem, rekao je: "Nema





nijednog vjerovjesnika a da mu Allah nije dao dokaz zbog kojeg su mu ljudi povjerovali, a ono što je meni dato jeste Objava koju mi je Allah objavio, i nadam se da ću imati najviše sljedbenika na Sudnjem danu." (Buhari od Ebu Hurejre)

Mjesec ramazan je mjesec časnog Kur'ana, u kojem je počelo njegovo objavljivanje. Kur'an u ovom mjesecu ima posebnu moć i djelovanje na ljudska srca, jer post slabi sklonosti ka zlu i porive za grijehom, slabi želje tijela, a jača želje duše, čovjekom ovladavaju porivi za dobrom, i pohrli dobru zbog kojeg je stvoren i udaljava se od zla na koje je upozoren, i zato učite Kur'an što je više moguće. Osman, radijallahu anhu, rekao je: "Da su nam srca čista, ne bismo se mogli zasititi govora našeg Gospodara, i nije mi drago da prođe jedan dan a da ne pogledam u Kur'an." (Bejheki)

O muslimani, razmislite o veličini Allahove darežljivosti i plemenitosti, kako će stanovnicima Dženneta uljepšavati i ukrašavati Džennet, dokle god traje ovaj svijet i prije nego što uđu u njega. Ibn Abbas, radijallahu anhuma, prenosi da je Vjerovjesnik, sallallahu alejhi ve sellem, rekao: "Džennet se uljepšava, svake godine, za ramazan." (Taberani) Ebu Hurejra, radijallahu anhu, prenosi da je Vjerovjesnik, sallallahu alejhi ve sellem, rekao: "Kada nastupi ramazan, otvore se džennetske kapije, a zatvore džehennemski vrata, i šejtani se povežu u okove." (Buhari)

Ebu Hurejra, radijallahu anhu, također prenosi da je Vjerovjesnik, sallallahu alejhi ve sellem, rekao: "Kada nastupi prva noć ramazana, zatvore se džehennemski vrata, i nijedna od njih ne ostanu otvorena, a otvore se džennetske kapije, i nijedna od njih ne ostanu zatvorena, i svake noći doziva glasnik: 'O ti koji želiš dobro, priđi! O ti koji želiš zlo, udalji se!', i Allah svaku noć nekoga oslobodi od Vatre." (Tirmizi)

U ovom mjesecu šejtani su povezani u okove, kako ne bi pokvarili post Muhammedovom ummetu, i zato je važno da ovaj vaš mjesec dočekate s iskrenim pokajanjem od svih grijeha, jer koliko je onih koji će doživjeti ovaj mjesec, ali ne i one poslije njega.

Izdvojite zekat iz svog imetka, vi lično, on vam je zaštita od Vatre, prije nego što pređe u ruke vaših nasljednika, a vi zbog njega budete kažnjeni jer niste dali zekat na





njega. Onaj ko ne bude davao zekat na novac, njegov novac će na Sudnjem danu doći u obliku zmije zvečarke, koja će ga uhvatiti za čeljusti i u njih ubrizgati svoj otrov, a ako ne bude davao zekat na stoku, na Sudnjem danu ona će ga gaziti svojim nogama i probadati svojim rogovima, u danu koji će trajati pedeset hiljada godina, kao što je zabilježeno u Buharijevoj i Muslimovoj zbirci hadisa, da nas Allah sačuva od toga. Uzvišeni kaže: "O vjernici, Allaha se bojte, i neka svaki čovjek gleda šta je za sutra pripremio i Allaha se bojte jer On dobro zna šta radite. I ne budite kao oni koji su zaboravili Allaha, pa je On učinio da sami sebe zaborave; to su pravi grešnici." (El-Hašr, 18–19)

O muslimani, mnogo je stvari koje čovjeka usrećuju na ovom svijetu, i njegova zadovoljstva su bezbrojna, a neka od njih Allah, džellešānuhu, spomenuo je u Svojoj Knjizi, rekavši: "Ljudima se čini da je lijepo samo ono za čim žude: žene, sinovi, gomile zlata i srebra, divni konji, stoka i usjevi. To su blagodati u životu na ovome svijetu; a najljepše mjesto povratka je u Allaha." (Ali Imran, 14)

Vjerovjesnik, sallallahu alejhi ve sellem, rekao je: "Dunjaluk je sladak i privlačan, i Allah će vas učiniti njegovim nasljednicima, da bi vidio kako ćete postupati. Čuvajte se dunjalučkih ukrasa i čuvajte se žena (tj. njihove zavodljivosti), jer je prvo iskušenje kod Israilićana bilo zbog žena." (Muslim od Ebu Seida el-Hudrija)

Međutim, dunjalučki užici su prolazni i kratkotrajni, a ono čemu bi se istinski trebalo radovati jeste Allahova milost koju On spušta u ovom mjesecu u vidu raznovrsnih oblika pobožnosti. Uzvišeni kaže: "O ljudi, već vam je stigla pouka od Gospodara vašeg i lijek za vaša srca i uputstvo i milost vjernicima. Reci: 'Neka se zato Allahovoj blagodati i milosti raduju, to je bolje od onoga što gomilaju.'" (Junus, 57–58)

O vjernici, budite dobročinitelji, jer u hadisu se kaže: "Tražite Me kod slabih", tj. ispunite njihova prava, "zaista vam opskrba i pomoć dolazi zbog onih najslabijih, najnezaštićenijih, među vama." (Ebu Davud od Ebu Derde, radijallahu anhu)

Donosite salavate i selame na prvaka svih poslanika, Muhammeda, sallallahu alejhi ve sellem, to vam je Allahova naredba, Koji je rekao: "Allah i meleki Njegovi





"KOLIKO GOD ZNAČAJNA ULOGA HATIBA BILA ZA USPJEH NJEGOVE HUTBE,
NIŠTA MANJE NE ZAOSTAJE NI ODABIR TEME, ODNOSNO MATERIJJE
KOJU TOKOM HUTBE ELABORIRA." (PREPOROD)

HUTBE 

blagosilju Vjerovjesnika. O vjernici, blagosiljajte ga i vi i šaljite mu pozdrav!" (El-Ahzab, 56)

